

დადგენილება №19
2019 წლის 31 ივლისი

ქ. თბილისი

„ელექტროენერგეტიკის, ბუნებრივი გაზისა და წყალმომარაგების სექტორში რეგულირების საფასურის გაანგარიშებისა და გადახდის წესის“ დამტკიცების შესახებ

„ნორმატიული აქტების შესახებ“ საქართველოს ორგანული კანონის მე-14 მუხლისა და „ელექტროენერგეტიკისა და ბუნებრივი გაზის შესახებ“ საქართველოს კანონის მე-5 მუხლის „დ“ ქვეპუნქტის საფუძველზე, საქართველოს ენერგეტიკისა და წყალმომარაგების მარეგულირებელი ეროვნული კომისია ადგენს:

1. თანდართული სახით დამტკიცდეს „ელექტროენერგეტიკისა და ბუნებრივი გაზის სექტორში რეგულირების საფასურის გაანგარიშებისა და გადახდის წესი“.
2. ეს დადგენილება ამოქმედდეს 2020 წლის 1 იანვრიდან.
3. ამ დადგენილების ამოქმედებისთანავე ძალადაკარგულად გამოცხადდეს საქართველოს ენერგეტიკისა და წყალმომარაგების მარეგულირებელი ეროვნული კომისიის 2008 წლის 18 სექტემბრის №24 დადგენილება „ელექტროენერგეტიკის, ბუნებრივი გაზისა და წყალმომარაგების სექტორში რეგულირების საფასურის გაანგარიშებისა და გადახდის წესების დამტკიცების შესახებ“ (საქართველოს საკანონმდებლო მაცნე, სსმ, №140, 22/09/2008, სარეგისტრაციო კოდი: 300.280.000.16.009.012.191).

საქართველოს ენერგეტიკისა და
წყალმომარაგების მარეგულირებელი
ეროვნული კომისიის თავმჯდომარე
კომისიის წევრი
კომისიის წევრი
კომისიის წევრი
კომისიის წევრი

ირინა მილორავა

მაია მელიქიძე
დავით ნარმანია
გიორგი ფანგანი
გოჩა შონია

ელექტროენერგეტიკის, ბუნებრივი გაზისა და წყალმომარაგების სექტორში რეგულირების საფასურის გაანგარიშებისა და გადახდის წესი

მუხლი 1. ელექტროენერგეტიკის, ბუნებრივი გაზისა და წყალმომარაგების სექტორში რეგულირების საფასურის გაანგარიშებისა და გადახდის წესის მიზანი

ელექტროენერგეტიკის, ბუნებრივი გაზისა და წყალმომარაგების სექტორში რეგულირების საფასურის გაანგარიშებისა და გადახდის წესის (შემდგომში – წესი) მიზანია „ეროვნული მარეგულირებელი ორგანოების შესახებ“ საქართველოს კანონითა და „რეგულირების საფასურის შესახებ“ საქართველოს კანონით განსაზღვრული რეგულირების საფასურის ოდენობის, მისი გაანგარიშებისა და გადახდის წესების, პერიოდულობის და ვადების დადგენა.

მუხლი 2. რეგულირების საფასური. რეგულირების საფასურის გადამხდელი

1. „ელექტროენერგეტიკისა და ბუნებრივი გაზის შესახებ“ საქართველოს კანონით განსაზღვრულ რეგულირებად საქმიანობებზე რეგულირების საფასურის ოდენობა განისაზღვრება ამ წესების დანართი № 1-ში მითითებული კოეფიციენტებით.
2. რეგულირების საფასური გადაიხდება რეგულირების საფასურის გადამხდელის მიერ და განკუთვნილია საქართველოს ენერგეტიკისა და წყალმომარაგების მარეგულირებელი ეროვნული კომისიის (შემდგომში – კომისია) მიერ „ელექტროენერგეტიკისა და ბუნებრივი გაზის შესახებ“ საქართველოს კანონითა და „ეროვნული მარეგულირებელი ორგანოების შესახებ“ საქართველოს კანონით განსაზღვრული ფუნქციებისა და უფლებამოსილებების განხორციელებასთან დაკავშირებული ხარჯების დასაფარად.
3. ამ წესით განსაზღვრული რეგულირების საფასურის გადამხდელები (შემდგომში – რეგულირების



საფასურის გადამხდელი) არიან ის პირები, რომელთა საქმიანობის წესი და პირობები განსაზღვრულია „ელექტროენერგეტიკისა და ბუნებრივი გაზის შესახებ“ საქართველოს კანონით; კერძოდ, წყალმომარაგების, ელექტროენერჯის წარმოების, გადაცემის, დისპეტჩერიზაციის, განაწილების, ბუნებრივი გაზის ტრანსპორტირების და განაწილების ლიცენზიატები, აგრეთვე, მცირე სიმძლავრის ელექტროსადგურები, იმპორტიორები, ექსპორტიორები, ელექტროენერჯის საბითუმო მიმწოდებლები, ბუნებრივი გაზის მიმწოდებლები, და ელექტროენერგეტიკული სისტემის კომერციული ოპერატორი.

4. რეგულირების საფასური კომისიის მიერ მხედველობაში მიიღება რეგულირების საფასურის გადამხდელისათვის ტარიფის დადგენისას, ხოლო იმ შემთხვევაში, თუ რეგულირებად საქმიანობაზე კომისია არ ადგენს ტარიფს, რეგულირების საფასური გაითვალისწინება რეგულირების საფასურის გადამხდელის ხარჯებში.

მუხლი 3. ანგარიშგება და საფასურის გამოთვლა

1. რეგულირების საფასურის გადამხდელი ვალდებულია, ყოველი საანგარიშო თვის დამთავრებიდან არაუგვიანეს 30 კალენდარული დღის ვადაში კომისიის ოფიციალური ვებგვერდის (www.gnerc.org) მეშვეობით ელექტრონული ფორმით წარუდგინოს კომისიას სრული, ზუსტი და გადამოწმებული ინფორმაცია საანგარიშგებო თვის განმავლობაში მიწოდებული/გაწეული რეგულირებას დაქვემდებარებული მომსახურების ან/და პროდუქტის მთლიანი ღირებულების შესახებ შესაბამისი ფასისა და მოცულობების მითითებით, რის შემდეგაც ელექტრონულად დაგენერირდება ანგარიშ-წინადადება/ინვოისი იმავე ნომრითა და თარიღით, რა ნომრით და თარიღითაც წარდგენილი იქნება ანგარიშგების ფორმა.

2. რეგულირების საფასურის გადამხდელს უფლება აქვს ერთჯერადად დაზუსტოს (დააკორექტიროს) ამ მუხლის პირველი პუნქტის შესაბამისად ელექტრონული ფორმით წარდგენილი ინფორმაცია მისი წარდგენიდან 10 დღის ვადაში (მაგრამ არაუმეტეს საანგარიშო თვის დამთავრებიდან 40 კალენდარული დღისა); ამ შემთხვევაში, ელექტრონული ანგარიშ-წინადადება/ინვოისი დაგენერირდება ხელახლა.

3. თუ რეგულირების საფასურის გადამხდელი ერთდროულად ეწევა ერთზე მეტ რეგულირებად საქმიანობას, იგი ვალდებულია, განხორციელებულ რეგულირებად საქმიანობებზე რეგულირების საფასურის გაანგარიშებები წარადგინოს ცალ-ცალკე – ყველა ასეთი საქმიანობისათვის დამტკიცებული ფორმის შესაბამისად.

4. რეგულირების საფასური გამოითვლება შემდეგი ფორმულით:

$$R=Q* K$$

- სადაც,
- „R“ – რეგულირების საფასური (ქართულ ლარში);
 - „Q“ – რეგულირებადი საწარმოს მიერ საანგარიშო თვის განმავლობაში რეგულირებას დაქვემდებარებულ საქმიანობაზე დარიცხული შემოსავალი (დღგ-ის გარეშე);
 - „K“ – შესაბამისი რეგულირებადი საქმიანობისათვის ამ წესების დანართი №1-ით განსაზღვრული რეგულირების საფასურის კოეფიციენტი.

მუხლი 4. რეგულირების საფასურის გადახდის წესი და გადახდის უზრუნველყოფის საშუალებები

1. რეგულირების საფასურის გადახდა ხორციელდება ყოველთვიურად, რეგულირების საფასურის გადამხდელის მიერ კომისიის საბანკო ანგარიშზე ჩარიცხვის გზით, საანგარიშო თვის დამთავრებიდან არაუგვიანეს 45 კალენდარული დღის ვადაში.

2. იმ შემთხვევაში, თუ რეგულირების საფასურის გადამხდელი პირი სამჯერ ან მეტჯერ დაარღვევს ამ წესებით რეგულირების საფასურის გაანგარიშების წარდგენის ან/და გადახდისათვის განსაზღვრულ ვადას, კომისია უფლებამოსილია, რეგულირების საფასურის გადამხდელს ინდივიდუალური ადმინისტრაციულ-სამართლებრივი აქტით დაავალოს გონივრულ ვადაში ფინანსური გარანტიის წარდგენა როგორც რეგულირების საფასურის არსებული დავალიანების, ასევე მომავალი სამი თვის პერიოდში მოსალოდნელ სავარაუდო გადასახდელ თანხაზე (რომელიც იანგარიშება შესაბამისი პირისათვის ბოლო სამი თვის განმავლობაში დარიცხული რეგულირების საფასურის ჯამური ოდენობით).



მუხლი 5. რეგულირების საფასურის ოდენობის კორექტირება და პერიოდული შედარება

1. რეგულირების საფასურის გადამხდელს უფლება აქვს, მოითხოვოს რეგულირების საფასურის თანხის კორექტირება:

ა) წლიურ ფინანსურ ანგარიშგებაში ასახული შემოსავლის დაზუსტების შემთხვევაში, ფინანსური ანგარიშგების შედგენისა და მასზე აუდიტორული დასკვნის (თუ კომისიის აქტების შესაბამისად, საწარმოს ეკისრება მხოლოდ ფინანსური ანგარიშგების წარდგენა – ამ ანგარიშის) შედგენიდან – ერთი თვის ვადაში;

ბ) „ელექტროენერჯისა და ბუნებრივი გაზის შესახებ“ საქართველოს კანონის საფუძველზე გაცემული აქტების საფუძველზე, წინა პერიოდის/პერიოდების მონაცემების შეცვლის/ჩასწორების შემთხვევაში – შესაბამისი შეცვლის/ჩასწორების დადასტურებიდან (დოკუმენტის შედგენიდან) – არაუმეტეს ერთი თვის ვადაში.

2. ამ მუხლის პირველი პუნქტით გათვალისწინებულ შემთხვევაში, რეგულირების საფასურის გადამხდელი ვალდებულია კომისიას წარუდგინოს დეტალური განმარტება კორექტირების გამომწვევი გარემოებების შესახებ შესაბამის დოკუმენტებთან ერთად..

3. როგორც რეგულირების საფასურის გადამხდელს, ასევე კომისიას უფლება აქვს მოითხოვოს დარიცხული ან/და ფაქტობრივად გადახდილი რეგულირების საფასურის ოდენობის შედარება ერთი კალენდარული წლის განმავლობაში არაუმეტეს ორჯერ. მოთხოვნა მისი მიღებიდან ორი კვირის ვადაში უნდა დადასტურდეს ორმხრივი აქტით.

4. დარიცხული ან/და ფაქტობრივად გადახდილი რეგულირების საფასურის ოდენობის შედარება სავალდებულოდ უნდა განხორციელდეს თუ რეგულირების საფასურის გადამხდელს:

ა) მოთხოვნილი აქვს მის სახელზე გაცემული ლიცენზიის გაუქმება; ან

ბ) კომისიაში წარმოდგენილი აქვს კანონმდებლობით გათვალისწინებული შეტყობინება რეგულირებადი საქმიანობის შეწყვეტის თაობაზე.

5. იმ შემთხვევაში, თუ რეგულირების საფასურის გადამხდელი ერთდროულად ახორციელებს რამდენიმე რეგულირებად საქმიანობას და რეგულირების საფასურის ოდენობის შედარება მოითხოვა ამ მუხლის მე-3 პუნქტის საფუძველზე, შესაბამისი შედარების აქტი როგორც წესი, უნდა გაფორმდეს იმ ფორმით, რომ გამიჯნული იყოს რეგულირებას დაქვემდებარებული საქმიანობების სფეროები.

6. ამ მუხლის მე-4 პუნქტის „ა“ ქვეპუნქტში მითითებულ შემთხვევაში, კომისია უფლებამოსილია რეგულირების საფასურის გადამხდელს მოსთხოვოს როგორც არსებული დავალიანების დაფარვა, ასევე რეგულირების საფასურის გადახდა შესაბამისი ლიცენზიის გაუქმებამდე მისაღებ საპროგნოზო შემოსავლებზე; ამ ვალდებულების შესრულებამდე კომისია უფლებამოსილია არ გააუქმოს შესაბამისი ლიცენზია.

7. თუ ამ მუხლის მე-4 პუნქტის „ბ“ ქვეპუნქტში მითითებულ შემთხვევაში, დარიცხული ან/და ფაქტობრივად გადახდილი რეგულირების საფასურის ოდენობის შედარების შემდეგ მხარეთა მიერ შედგენილი შედარების დოკუმენტით (აქტით) გამოვლინდა ზედმეტად გადახდილი თანხა, იგი რეგულირების საფასურის გადამხდელს უნდა დაუბრუნდეს შედარების აქტის შედგენიდან 15 კალენდარული დღის ვადაში; თუ დადასტურდა, რომ რეგულირების საფასურის გადამხდელს აქვს რეგულირების საფასურის დავალიანება, მან ეს დავალიანება სრულად უნდა დაფაროს ასევე 15 კალენდარული დღის ვადაში, ხოლო რეგულირების საფასურის დავალიანების სრულად დაფარვამდე, ამ წესების მიზნებისათვის, ეს პირი ითვლება რეგულირების საფასურის გადამხდელად.

მუხლი 6. პასუხისმგებლობა

რეგულირების საფასურის გადამხდელის მიერ ამ წესის მოთხოვნების დარღვევის (მათ შორის, ნებისმიერი უწყვეტი 12 თვის პერიოდში ამ წესების მე-3 მუხლის პირველი და მე-2 პუნქტებით გათვალისწინებულ სამ ან მეტ ანგარიშგებაში არაზუსტი/არასრული ინფორმაციის მითითების) შემთხვევაში, კომისია უფლებამოსილია ამ პირის მიმართ გამოიყენოს კანონმდებლობით მინიჭებული უფლებამოსილებანი.

მუხლი 7. გარდამავალი დებულებები

1. რეგულირების საფასურის გადამხდელი პირების მიერ 2019 წლის პერიოდზე გადახდილი საპროგნოზო და



ფაქტობრივი რეგულირების საფასურის ოდენობის შედარება უნდა განხორციელდეს არაუგვიანეს 2020 წლის 1 სექტემბრამდე და თუ მხარეთა მიერ შედგენილი შედარების დოკუმენტით (აქტით) გამოვლინდა, რომ რეგულირების საფასურის გადამხდელს:

- ა) ზედმეტად აქვს გადახდილი თანხა, შესაბამისი წერილობითი მოთხოვნის წარდგენიდან 15 კალენდარული დღის განმავლობაში იგი დაუბრუნდება რეგულირების საფასურის გადამხდელს, ხოლო თუ აქტის შედგენიდან ერთი თვის ვადაში აქ იქნა ასეთი მოთხოვნა წარდგენილი, ჩაეთვლება წინასწარ გადახდილად;
- ბ) აქვს რეგულირების საფასურის დავალიანება, მან ეს დავალიანება სრულად უნდა დაფაროს შედარების აქტის გაფორმებიდან 15 კალენდარული დღის ვადაში.

2. კომისიის ნორმატიული ადმინისტრაციულ-სამართლებრივი აქტით რეგულირების საფასურის გადამხდელების მიერ ანგარიშგების დოკუმენტბრუნვის ერთიანი ავტომატური საშუალებებით წარდგენის (წარმოების) ვალდებულების დადგენამდე ამ წესებით განსაზღვრული ანგარიშგების წარდგენა ხორციელდება მატერიალური ან ელექტრონული ფორმით, შემდეგი წესით:

რეგულირების საფასურის გადამხდელი კომისიის ვებგვერდზე (www.gnerc.org) ავსებს ანგარიშგების ფორმას და შევსების დასრულებას ადასტურებს ღილაკზე დაჭერის გზით, ხოლო ვებგვერდის მიერ შესაბამისი ფორმის (Adobe PDF-ის ფორმატში) გენერირებისა და უნიკალური კოდის მინიჭების შემდეგ ელექტრონული ფორმატში ჩამოტვირთავს მას საკუთარ კომპიუტერში, რის შემდეგაც რეგულირების საფასურის გადამხდელის უფლებამოსილი პირი (მეწარმეთა და არასამეწარმეო (არაკომერციული) იურიდიული პირების რეესტრში საწარმოს ხელმძღვანელად/წარმომადგენელად რეგისტრირებული პირი ან მისი განკარგულებით განსაზღვრული სხვა პირი):

- ა) ამობეჭდავს მას, მოაწერს ხელს და მატერიალური ფორმით უგზავნის კომისიას; ან
- ბ) ელექტრონულად მოაწერს მას ხელს საკუთარი კვალიფიციური ელექტრონული ხელმოწერით ან, რეგულირების საფასურის გადამხდელის სახელზე გაცემული კვალიფიციური ელექტრონული შტამპით და ელექტრონული ფოსტის მეშვეობით აგზავნის მას მისამართზე: reporting@gnerc.org.

დანართი №1

ლიცენზიატების, მიმწოდებლების, იმპორტიორების, ექსპორტიორების, მცირე სიმძლავრის ელექტროსადგურებისა და ელექტროენერგეტიკული ბაზრის ოპერატორის რეგულირების საფასურის კოეფიციენტები

1. ელექტროენერგეტიკის, ბუნებრივი გაზის და წყალმომარაგების სექტორის ლიცენზიატების, მიმწოდებლების, იმპორტიორების, ექსპორტიორების, მცირე სიმძლავრის ელექტროსადგურებისა და ელექტროენერგეტიკული ბაზრის ოპერატორის მიერ გადასახდელი რეგულირების საფასურის კოეფიციენტები:

ბუნებრივი გაზის სექტორი:	
მიმწოდებელი	0.002
ტრანსპორტირების ლიცენზიატი	0.002
განაწილების ლიცენზიატი	0.002
ელექტროენერგეტიკული სექტორი:	
წარმოების ლიცენზიატი	0.002
გადაცემის ლიცენზიატი	0.002
დისპეტჩერიზაციის ლიცენზიატი	0.002
განაწილების ლიცენზიატი	0.002



მცირე სიმძლავრის ელექტროსადგური	0.002
იმპორტიორი	0.002
ექსპორტიორი	0.002
ელექტროენერჯის საბითუმო მიმწოდებელი	0.002
ელექტროენერგეტიკული ბაზრის ოპერატორი	0.002
წყალმომარაგების სექტორი:	
წყალმომარაგების ლიცენზიატი	0.002

2. ელექტროენერგეტიკული ბაზრის ოპერატორის რეგულირების საფასურის განსაზღვრისას მის შემოსავალში არ გაითვალისწინება იმ საქმიანობიდან მიღებული შემოსავალი, რომლიდანაც საქართველოს კანონმდებლობის თანახმად, არ უნდა რჩებოდეს მოგება, მოცემულ შემოსავალში არ იგულისხმება ელექტროენერგეტიკული ბაზრის ოპერატორის მომსახურების საფასურით მიღებული შემოსავალი.

